

sariin dii! Bɛm-n sɔbb Sangband nɔngan! Welee beebii bɛm na n` hooddimgu nnii! ¹⁵ Bɛm-n keliigu na n` fanm nigiiigu Gohɔmt! Welee boo nagagt nn fidr n` nakpain tii. ¹⁶ Lɔg-n gwɛet hɛn tiim wo bii b` ba b` tɔrg-n na n` tɔgdrn Kunida rahm fiimi bii! ¹⁷ Ta lɔg-n n` jugu dahb wo hoodheer! N` lɔg Sangband gwɛet wo hoodjuuga *Vohoom Buudm nn sah kee.

¹⁸ Seejɛm-n ka gbaama Sangband bii nn halwa bii mɛmbii ka tagaa n Vohoom Buudm! Hɛm-n welee ka kpaasaa, ka ba saw ka ked n nɔngan, ka ta seena sangbantiiba mɛmba jugun!

¹⁹ Ta seejɛm-n mɔ jugun na mɔ wen ba mɔ yahdgm mɔ noor, Sangband lɔom mɔ noon gwɛet ln ba na mɔ biir tii, ka bo na mɔ reem kɛɛkɛhgan gwɛet t` hɛl Gohɔmt tii ka kpaɛ fobɛhgu. ²⁰ Krista tomra-ma na mɔ bɔhɔom Gohɔmt. Tii kaa nnii man ba sargan. Seejɛm-n na mɔ bɔhɔom-t wo ln gbaama lee ka ba mɔ sɔklbn!

Seenkaawrb

²¹ Mɔ bagl na nii ta miig man hɛna bii n nan man ba b` ni bii. T` teelhɔm Tisiika ba hɔ biir-n l` menguu. Hɔ ba na Berma ηmɛɛheedhɔmn. ²² Mɔ ta tamna-wu n` man na hɔ biir-n t` gwɛet, hɔ haflg n` kwɛɛwa.

²³ Sa Sangband n Berm Yeesu Krist bɔ si t` teelbee mɛmbɛe nigiiigu n sɔklb n gwɛet hɛn tiim! ²⁴ Biiba bɔ sɔkla t` Berm Yeesu Krist n sɔklb b` kpaasaa dihaa bii bee mɛmbɛe, Sangband hɔmgu bɛm bɔ man!



Tawdwu n hɔ hoodwant

Fɔla wadga han da hɔd
FILIIFI TIIBA
kee

————— B` ba wadgankenan bii —————

Fɔla hɔda wadgankena Filiifi Krista tiiba. Filiifi nnii Hɛrɔɔf kɔnoogrgu Fɔla kan da faa Gohɔmt. Ree nnii han da koolg kpaturu (Tumtba ηmɛɛgt 16. 12-40). Kɔrguu da ba Masedonii kpadn, goona Grɛɛs tantn. Bina halanfa n hɔ kaan, hɔ hoorm Filiifi tiiba sɔklb wadgankena ka ba sargan. Hɔ da hɔda-ka ka seena-ba want ban sir-wu tii kaa. Lee wen, hɔ da ba kunyɔɔn kpaalaa. Hɔ da ta bagl na hɔ si-ba ηmɛenm na bɔ nawr n Krist ka kpaasaa na gokaat tiit jib bɔ kpaturun.

- Hubi^{19a}, vug^{1u} kakehnan vug^{11un}, Fɔla weraa Filiifi kpaturu tiiba na hɔ ba nyaaɔbn hɔ wen diila bɔ ret.
- Hubi^{19a}, vug^{12u} kakehnan vug^{26un}, hɔ bɔhɔɔ-ba han ba lee. Han kpaasaa mi b` ba b` getg hɔ jugun bii n nɔngan lee, wu n Krist bɔ laglgm t` ka sah-wu daaɔb kpaalaa.
- Hubi^{19a}, vug^{27u} kakehnan hubi^{29a} vug^{18un}, hɔ gbaama Filiifi tiibee na bɔ mad gwɛet hɛn tiim l` bu, ka bag na humb bɛm bɔ huuga, bɔ hohla bayen taa kwɛɛn, ka tora taa n Vohoom m` rɛna Yeesu Krista ni mii.
- Hubi^{29a}, vug^{19u} kakehnan vug^{30un}, hɔ tuuma Hɛfafɔɔditwu n hɔ ηmɛɛheedtuur Timoteewu Filiifi tiiba man, na bɔ kpat bɔ mad tuurnt t` ba wu n ban bɔ huuga tii ka daag na hɔ nan mɔɔɔg-ba nyaanb.
- Hubi^{39a}, vug^{1u} kakehnan hubi^{49a} vug^{1un}, hɔ vɛnaa Filiifi tiiba nabiir na bɔ mug bayen n biiba bɔ gɔntra Gohɔmt mɔmt bee, ka gbaama-ba na bɔ tagd hɔ nakpaɛa ka bag Krista tiit neerm nn togla n bii. Bii nnii na v` bɛm wo Yeesu Krista.
- Hubi^{49a}, vug^{2u} kakehnan vug^{23un}, hɔ togla n ηmɛenm sahb jugu jugu n seenb. Hɔ ta seena-ba na bɔ hera ηmɛɛɔb n sahm-wu want.

Seenj

1 ¹ Yeesu Krista ημεεheedba ten, man Foola, n Timotee t' hoora-n wadgankena. T' hoora-ka nen, nen ba Filiifi ka laglg n Yeesu Krist n kit Sangband reba nen, n n' kpaturu bermba n ba togtba.

² T' Sa Sangband n t' Berm Yeesu Krist bá si-n homgu n nigigu!

Foola seenja Sangband

³ Mà seenja Sangband herufi na dii hera ημεεg̃b mà wen diila n' mēmbēe n' hēn. ⁴ L' wen safi-ma na mà seenj Sangband n' mēmbēe n' hēn, má ka seenja n nyaag̃b. ⁵ Mà seenja-d welee l' bahr n na n' da torg-ma, log gonoogrd goor kakefnan jana, na Yeesu Krista Gohomt yadg. ⁶ Sangband koolg welee ημεεhombii n' huuga. Má ka mi hom na d' ba d' felgm-b hēb kakefnan Yeesu Krista daanm goor. ⁷ L' ba hom na mà bēn n welee diilfee n' mēmbēe n' hēn. Mà sokla-n kpaalaa. Ka mà ba sargan laa ka mà taaw hoodr Yeesu Krista Gohomt kaa, n' yuuj homgu Sangband nn ta her-ma kuu. ⁸ Mà bōhōō ka difaa n mà ni na mà sokla n' mēmbēe kpaalaa n Yeesu Krista soklb. Sangband miil welee na mà kpaahogla.

⁹ Mà gbaama-d n' jugun na n' taa soklb berijm goor wo goor, n' miig dn bag bii ¹⁰ n' nyigii, n' bantg bii b' ba hom bii n' bēn *kel kel, bà kpaah yu tiit na bà biir n' hēn Krista daanm goor. ¹¹ Goorii, Yeesu Krista ημεεhōmt kee t' bēn n' ni kpaalaa, l' nyokm ka jahra Sangband.

Foola ba sargan, Yeesua Gohomt t ka la yada

¹² Teelba-n, mà bo na n' miig na bii b' daan mà jugun bii hel n tor na Gohomt san n nongan. ¹³ Tii nii, bá kiig hurberma haar hēn bee mēmbēe n nidvolbee mēmbēe nn mi na Krista ημεεg̃b kaa nii man ba sargan. ¹⁴ Ban yuu-ma sargan lee, Krista tiiba kod t lo daag̃b n Berm l' yat, n ka kpaah n fobēhgu na bà faam nidba Sangband gwēet. ¹⁵ L' ba gobiint na bá ni biiba bōhōō Krista gwēet ka weraa bayen ka ba nōmmōlb n man, gwētafi, volba faa-t n kwēewhōmr. ¹⁶ Bee hēna welee na ban sokla-ma. Bà miil hom na Sangband lo-ma na mà teew Gohomt kaa. ¹⁷ Volbee faa Krista gwēet ka weraa bayen ka diila na bà hēwl-ma kunyōhgu sargan. Bá diilfee kpaah hom.

¹⁸ Hāhah! Lag bii nii! Ka bà la gwēela n kwēewbēhr laa n kwēewhōmrii, Krista hidr keda n nongan. Welee safi-ma nyaag̃b.

Biilm, maa mà nyaagm n welee l' ked n nongan. ¹⁹ Mà miil na welee kee l' dafi mà jugu ka tagaa n n' seenj n torgm Yeesu Krista *Vohoom nn kena n man mii.

²⁰ Biilm, bii man hod ka daag b' jugun bii nii na l' si-ma ηmeenm na jiwfi daa kpal-ma felafi. L' saa, mina mà neeran laa mà kpiirani, mà bagl na l' jeenjlm Kristwu nidba nongan wo ln manna lee. ²¹ Ka mà neerii, mà neera Krista kaa. Ka má kp̃ii, fatn. ²² Ka tantntina hēn neerm ba m' saa na mà he ημεεhōmb, lee wen, mà kpaah mi man ba mà ta kotg bii. ²³ L' dada-ma rena n rena. Mà bagl wo mà nyab tantntina hēn, má n Krist t' bēn, tii ba t' bēn hom l' yatg, ²⁴ gwētafi, l' ta ba hom n yat na mà neer nii kaa. ²⁵ Mà hilwa na ln ba nii, na mà ba mà neer, má n nn t' bēn taa man ka bo na n' gwēet hēn tiim berj na n' ta nyaagm m' kaa. ²⁶ Tii lee, man kee mà ηmetgn n' man lee, maa kaa, n' nyokm nyen Yeesu Krista kaa.

Foola weraa Krista tiiba neerm

Ff

²⁷ Gwelja, bii b' ba veveer bii nii na nii tagd huru hū magr n Krista Gohomt fuu ka bo na ka má daan n yum-n laa mà ba daanaa, mà hom na Gohomtii kaa nii nn ba n diilyena ka taaw hoodr n kwēewyend na t' hēn tiim ked n nongan. ²⁸ Daa solm-n n' rafeedba! Welee ba l' werii-ba na l' nan daraa bà tobr, na nen lee, l' dahra n' juuni. Sangband hera welee. ²⁹ Biilm, d' tag n Krista hēn n hēm-n homgu na n' daa tiim há hēn n jahaa, na n' ta di kunyōhgu há kaa, ³⁰ ka taaw hoodyend nn da nyan mà taaw nooga dii. Wo nn hum bà bōhōō lee, dii nii man la taaw.

2 ¹ ¿ Lag Krista hafila n' kwēewa? ¿ Lag há soklb safi-n ηmeenm? ¿ Lag n' n' *Vohoom Buudm n' laglg n hēm yenm? ¿ Lag n' sokla taa ka hēna taa homgu? ² Ln ba welee lee, mà gbaama-n na n' hom n taa ka ba n soklyenb n kwēewyend n diilyena, lee wen n' he na mà nyaag̃b sof. ³ Daa hēm-n bii ka diila na n' weriim nyen laa ka sokla na bá nyokm-n yem! Lee, hōhlgm-n nyen n' tuurmba kwēen vol wo vola! Baaben tia logm hayen na há tuura yata-wu! ⁴ Hii daa bagm hayen há homgu n jah'! Lee, ta diilgm-n vol wo vola n' tuurmba homgu hēn! ⁵ L' ba na n' bēn taa n beeb Yeesu Krista nn da ba n bii tuurmb.

2.1 ¿ Lag n' n' Vohoom Buudm n' laglg n hēm yenm? Baa bà bee bà ta hom na ¿ Lag Vohoom Buudm saa n' hēna yena?

6 Hâ manna ka ba na wii nnii Sangband, gwentafaa, hà ba bag na hà kεεml hayen n Sa Sangband^z,
 7 n gwid fan da ba n bii mεmbii kaawr, n hofl hayen, n kit tumta. Hâ kit nida n logm nida beeb.
 8 Hâ tii na hà neer ka hofla hayen n tiŋa ka buuŋa kakehnan hà kuum, kubefm fan da kpiir *dabragr hen mii.
 9 Tii kaa nnii Sangband nn da kolg-wu n faaga n lo-wu kaalanbermgan, n bahd-wu hidbermr d`yata hida mēna.
 10 D`da hera welee na bá valgm Yeesua hidrii, na bii b`neer sangbambiimn n tant hen n tant kwεen bii mεmbii gbafntm-wu dind
 11 ka rea ka faa na Yeesu Krist nnii Berma, lee, l`jeenl Sa Sangband.
 12 Mà teelhōmba-n, man da ba n`man lee, n`vala mà gwεet kakehnan. Gwεhŋa, man la kpaŋ n`man lee, l`ba na n`valgm-t l`yata. Hεm-n juuni dahb nn sohdg bii ηmεεgt, ka vala Sangband, ka sol-d, ¹³ ka mi na, dii hēna n`hēna ηmεεgtii ka safn-n gemmnt na n`soklm-t. Bii b`magr n dn bii nnii.
 14 Hεm-n want mēnt ka kpaā nyeera, ka kpaā kpal! ¹⁵ Lee wen, nn la neer goona nidba huuga l`ba na gokaat tiiba n nidbēhban lee, n`ba n`bēm n n`nyonyogm n n`kwεεwfeela. N`ta bēm na Sangband bii ka kpaŋ n hēbbēhba biib, ka wiir bà huuga wiinga wo ηmedii nn wiir lee, ¹⁶ ka weraa-ba neerm gwεet. Ka n`hēna welee, l`nan si-ma hidr Krista daanm goor. Goorii, l`nan werii biilm na mà ηmεεgt man da hēna tii, n giidm man da loo mayenwu mii, l`ba kpat yem.
 17 N`gwεet hen tiim boo *vit tiit nn vidr Sangband tii. Ka tiit, baa bà kuu-ma bà loo mà jiiim bà kpih l`hewl n`vitii hen. Ka l`ba welee, mà bēm lamεεgun, má n n`mēmbēe t`nyaagm. ¹⁸ Ta yenmii, l`ba na n`ta bēm lamεεgun, mà bewlg n`hen t`nyaagm.

2.6 Hâ ba bag na hà kεεml hayen n Sa Sangband. Baa bà bee bà ta hom na hà ba bag na hà lo hayenwu Sa Sangband tagr.

Foola bo na hà tom há tuurmba barehba Filiifi kōrgun

¹⁹ Mà hilwa na ka t`Berm Yeesua sokla, maa mà tamn Timoteewu n`man, ka bo na ka há dan n kpen, n`gwεet man ba mà hom há noon tii si-ma ηmeenm.
²⁰ Mà ta kpaŋ n hii n wii kaan hà diila wo man diila lee, ka ta diila n`ret n hà kwεεwr mēnd. ²¹ Volbee mēmbēe diila bayen bà ret hen, bà kpaā diila Yeesu Krista ret hen. ²² N`mōmba n`nyana Timotea beeb. Má n wun t`hera ηmεεgb wo sawu n hà buga na Gohōmt san n nongan. ²³ Man nan miigaa mà gwεet nn ba t`toglg n bii lee, mà tamn-wu yelmaa n`man.
²⁴ Ka Saberma t sokl, mà la miil hōm na mà mōm mà ta ba mà daan n`man. ²⁵ Lee, mà nyana na l`ba hōm na mà ηmelgn-n t`teel mà ηmεεheedtuur Hεfafroōditwu safn'. Má n wun t`taawa hoodr Gohōmt kaa. Wii nnii nn da tamn n bii b`da fad-ma bii, ŋ laa laa?
²⁶ Hâ bagl n mōlm na hà nyaan n`mēmbēe. Hān da miig na n`homra na hà doot bēhii lee, há rarm t ham. ²⁷ Hâ hera bēhii biilm n tohm nyarii, lee, Sangband t yum há kunyōŋu. D`ba nyaan wii kunyōŋu n jah', d`ta nyana mà reku na l`daa ta hewl-ma kuugu na mà daa kpi n diila.
²⁸ Lee, mà tuuna-wu weem ka bo na n`nyaan-wu n`ta nyaagm wo n`n wun nn da nyaaga lee, l`saa mà diila yadr. ²⁹ Wo n`n wun nn ba na Krista tiiba lee, sohdg-n-wu n nyaagb Saberma hidrn. Welee nidbee nnii ln ba na n`valgm. ³⁰ Biilm, hà goda jah na hà kpi Krista ηmεεgb kaa. Gbēfm n joom na há kpi ka tōra-ma n`loo^z.

Juuni dahb huru mōmu

3 ¹ Teelba-n, gwεhŋa nyaagm-n na n`n Saberm n`laglgn! L`kpaā giid-ma na mà lilm bōhōob man fetg hoorb bii, welee ba l`torg na bii daa hēe-n.
² Mad-n nyen n ηmεεheedbēhba, gwεin, kpağbotafn tiiban!
³ Ten nnii ban *bōdr biilm, lag bee, ten, ten seenja Sangband n d`*Vofoom gemmnt, ka nyōka tyen Yeesu Krista kaa ten. T`kpaā figr tyen t`hen. ⁴ Gwentaf, man ta ba mà bee mà figr mayen mà hen. Ka hii diila na hà ba hà bee hà figr hayen hà hen, maa nn

2.30 Ka tōra-ma n`loo, laa ka tōra-ma n`hidrn.

ba mà bee mà higr mà fien l` yata wiilah^z. ⁵ Bà da *botg-ma mà maadb goniindr goor, man nnii *Yisrafeel tia mōma, Beñyamiina buudmn, man nnii Hebra mōma kpaalaa. Bii b`hel Mohiisa *bafilb jugun bii, mà da valg-b ka tagd *Farisii tiiba kpaturu. ⁶ Mà da kpañ heee, ka loo Krista kpaturu tiiba kunyoŋu. L` saa, bii b`hel neerhōmm ban vala bafilb n sohd mii lee, hii da kpañ hà bee hà biir mà fien lii.

⁷ Welee beeb hōmb man da log wo mà fat bii, Krista hera má ka yuu-b b`kpaá tōn bii. ⁸ Mà hiluu n yum na lag mà beeb n jañ nnii man geewa l`kpaá tōn, bii bii ta kpaá tōn. Biilm, Yeesu Krista miig m yatg l`menguu. Wii kaa nnii man tii na mà bōrii l`menguu n ka geewa l`menguu wo bint ka bo na mà vōhdg Krist ⁹ mà nawr n wun kpaalaa. Lag man vala bafilb l`kaa nnii man ba na hōma. Krista fien tiim kaa nnii man kitg hōma. Biilm, Sangband saa na nida kitg hōma, ka hà ba n gwēet fien tiim.

¹⁰ Bii b`bee bii nnii na mà miig Krista, n hà kuumn himtgm gemmnt, n hà kunyoŋu deb, na jañ jañ mà bee mà tōn-wu hà kuumn, ¹¹ ka daag na mà nan ta himta kuumn mà neer.

¹² Mà kpaá diila na mà taara l`kaalaŋa, laa mina mà kitg hōmwu kpaalaa. Gwentaf, mà bahra ka ked n nōngan, ka hēna gemm na mà vōhdg fat, blaħb kaa, Yeesu Krista fetg-ma vōhdgm.

¹³ Mà teelba-n, mà kpaá diila na mà fetg fatii vōhdgm, gwentaf, mà loo nōmb bii byenb fien. Bii nnii na mà hōŋaa bii b`ba mà kaa bii, ka nagda mà ni na mà vōhdg bii b`ba mà nōngan bii. ¹⁴ Mà bahra mà noor ka sol kili na mà taai l`kaalaŋa, ka bo na mà yuuj fat Sangband nn tag n Yeesu Krista fien n ka hōf-t na t`sohdg sangbambiimn tii^z.

¹⁵ Ten, ten biir gwēet fien tiim ten, l`ba na t`bēm n welee diilfee. Ka n`ni hii diila n hayen, Sangband ba d`werii-wu ln ba na l`bēm lee. ¹⁶ Ka l`la ba lan, tn tagd-n huru tn manna ka tagd huu!

3.3-4 *Gwentaf, man ta ba mà bee mà higr mayen mà fien. Ka hii diila na hà ba hà bee hà higr hayen hà fien, maa nn ba mà bee mà higr mà fien l`yata wiilah. Baa bà bee bà ta hom na Gwentaf, man ta ba mà bee mà daagm nidba kowt fien. Ka hii diila na wii tag nidba kowt kaa hōm n ka daag t`henii, maa nn ba mà bee mà daagm t`fien l`yata wiilah.*

3.14 *Ka bo na mà yuuj fat Sangband nn tag n Yeesu Krista fien n ka hōf-t na t`sohdg sangbambiimn tii. Baa bà bee bà ta hom na ka bo na mà yuuj fat Sangband nn ba n faaga ka hōf-t na t`tag n Yeesu Krist t`sohdg tii.*

¹⁷ Teelba-n, togiim-n-ma n`mēmbēe! T`werii-n huru n`yum. Lee, lo-n nōmb biiba bà neer ka tagd hurfuu bee fien!

¹⁸ Mà bam ka bōhōo-n na nidba kōd neerm weraa na bee nnii Krista rafeedba l`bafn n bii fan her *dabragr fien bii. Gwēhŋa, mà lil-n-t bōhōob ka kuum. ¹⁹ L`nan togaa-ba n yem. Bá Sangband nnii bá raawt. Bà nyōka bayen n bii b`tigla-ba jiwfi bii, ka diila tantntina jugun want fien n jañ!

²⁰ Ten lee, ten nnii sangbambiimn tiiba. T`hōda n t`kwēewr mēnd na t`juuni dahda rēn kan hà daan. Wii nnii t`Berm Yeesu Krista. ²¹ Há gemmnt sira-wu huru na há di bermt want mēnt fien. Há kee hà log gemmntii, hà lagii t`tantntina fien figm gbani, hì tōn há gbanu ka nyinwa.

4 ¹ Tii lee, mà teelhōmba-n, nen man bag na mà nan mōoŋ nyaanb nen, nen ba na mà nyaagb n mà fat nen, mà tuurmba-n, hafilgm-n nyenwu welee neerm n`n Saberm nn neer miin!

Fōola bahla ka seenja Filiifi Krista tiiba

² Mà jobla Hēvodiiwu n Sintis na, hai, bá bēm n diilyena ka mi na Saberma hefi n ban.

³ L`saa, Sisiig ven, ln ba na ven nnii mà ημεεheedtuur wo v`hidr nn bōhōo lee^z, tōrg fōgbee! Biilm, bà da teewra hoodr na Gohōmt ημεεgb san n nōngan. Má n ban n Kelmaa n mà ημεεheedtuurvolba bá hida ta ba neerm wadgan bee mēmbēe, t`da hera welee ημεεgbii.

⁴ Nyaagm-n heruf na n`n Berm n`laglgn! Mà lil-n-t bōhōob, nyaagm-n! ⁵ Bēm-n hōm n nidba mēmba ka deer na Berma daanm ba nyōh! ⁶ Daa kuum nyenwu n diila bii fien! Lee, ka l`la ba lan, seejŋm-n Sangband ka gbaama-d nn halwa bii, ka seenja-d na d`hera ημεεgb!

⁷ L`saa, Sangband si-n d`nigiigu, kuu yata rarm mēnm, kù ba kù nawlgm n`kwēewa n`diila n Yeesu Krista!

⁸ Mà teelba-n, mà gokaawrt nnii na: Lōom-n nōmb bii b`ba hōm ka tōn na bá nyōkm bii fien! Bii nnii bii b`ba gobiint, n bii b`ba na bá valgm, n bii b`ba sōbb, n nan bii b`mag na bá sōklm ka bōhōo b`gwēet bii. Diilgm-n bii fien!

4.3 *L`saa, Sisiig ven, ln ba na ven nnii mà ημεεheedtuur wo v`hidr nn bōhōo lee, ... Baa bà bee bà ta hom na L`saa, mà ημεεheedtuurbuud ven, ...*

⁹ Bii nn kpɛlɔ n sohd mà man bii, nn homr mà noon n yum mà hɛna bii, hɛm-n-b²! Lee wen, Sangband si-n nigligu d`bem n`man.

¹⁰ T` Berm Yeesua sira-ma nyaagb biii, blaɛb kaa, n` bee n werii na n`la deera mà jugun. Biilm, n` deera mà jugun hɔm, gwɛntaɛ, n` da ba nyaan huru na n`werii-ma welee.

¹¹ Mà gwɛɛla welee, lag na man halwa l`kaa. Baa l`la ba lan, maa mà neer. Mà kpɛlɔ l`mɛngu. ¹² Mà miil man neer bii wen kpaɛ lee wen, ka ta mi man neer l`wen tɔr lee. Mina bii bee na mà di laa kɔm kua-ma, mina mà ba kwɛgdm laa katɛdga, mà kpɛlɔ l`mɛnguun neerm. ¹³ Mà bea l`mɛngu n hii hà haɛla-ma wii, wii nnii Krista.

¹⁴ Ln la ba welee lee, n` hɛm hɔm n tɔr-ma mà kunyɔɔɔ deb. ¹⁵ Filiifi tiiba-n, n` miil hɔm na man da baɛ Masedonii n ka faa Gohɔmt n dan n nyab n`man lee, n` kpaturhuu n jaɛ da tɔra-ma. Má n nn t`da lagaa taa ka sohd tɛn halwa bii.

¹⁶ Man da taai Tesaloniik yelmaa lee, n` baɛ ree n tuun-ma tɔmb mɛɛm² man da halwa bii.

¹⁷ Mà kpaa fɛba ka bag na bá saɛm-ma want. Man bag bii nnii na Sangband hɛwɛl bii nn sohd bii hɛn, l`yadg n nn n`saɛb kaa.

¹⁸ Mà sohdg nn tuun bii mɛmbii. L`yatg man da halwa bii. Man sohdg Hɛfafrɔɔdita nuhun nn tuun bii lee, bii ta kpaa fad-ma. N`wantii boo *vit Sangband nn sohd na t`ruhu bee-d loogu tii.

¹⁹ Mà Sa Sangband ba n kɛgt biii. D`kee d`tag n Yeesu Krist d`si-n bii b`fad-n bii mɛmbii. ²⁰ Bá nyɔkm t`Sa Sangband kakeɛnan! L`bem welee!

²¹ Seen-n sangbantiibee mɛmbee hayen hayen! Bá n Yeesu Krist l`laglɔ yena.

T`teelba bá ba mà man bee seena-n. ²² Sangbantiiba bá ba nnaɛ bee mɛmbee ta seena-n, hurbermaa rebee mɔmba.

²³ T` Berm Yeesu Krista hɔmgu bem n`man!

4.9 Bii nn kpɛlɔ n sohd mà man bii, nn homr mà noon n yum mà hɛna bii, hɛm-n-b! Baa bà bee bà ta hom na Bii nn kpɛlɔ n sohd mà man bii, nn homr mà noon n yum mà hɛna bii nnii. Hɛm-n-b!

4.16 Tɔmb mɛɛm. Baa bà bee bà ta hom na tɔmb mliim.

Fɔɔla wadga han da hɔd

KOLɔɔS TIIBA

kee

————— B`ba wadgankenan bii —————

Fɔɔla hɔda wadgankena Kolɔɔs Krista tiiba. Kɔrguu da ba Hɛsii kpadn, goona Tirkii tantn. L`boo Fɔɔla ban san kan n yum. Wo hà ɛmɛɛheeduur Hɛfafraaswii mɔma nn ba na Kolɔɔs tiin lee, wii da san kan n Gohɔmt noogrm, lee, n kool kan kpaturhuu.

Fɔɔla da ba sargan Roomaa kɔrgun, Hɛfafraasa t san n bɔhɔɔ-wu na biiba haama Kolɔɔs Krista tiiba rarm n gokwɛɛnt tiit. Bee laɛba bɔhɔɔ na saɛ na Krista tia miig Sangband hɔm hà sohdg jugu daɛb, l`ba na hà door vohoomn gemmnt tiit kwɛɛn, l`saa bà hee-wu kowt tiit wo bɔtgm, hà valgm diit n daam sent dee dee. Ban bed-wu welee lee, Fɔɔla t hoorm-ba wadgankena ka deeda-ba na jugu daɛb Sangband nn sir ka tagaa n Yeesu Krist bii taara welee.

– *Hubi1^{9a} kakeɛnan hubi2^{9a}, vug19^{un}, Fɔɔla ree Krista huraant gwɛɛt n bɔhɔɔ na bá miim na hà ba n gemmnt ka yata l`mɛngu, na wii nnii kpaturu jugu tia.*

– *Hubi2^{9a}, vug20^u kakeɛnan hubi4^{9a}, Fɔɔla deeda-ba neerkwɛɛlm ban neer ka laglɔ n Krist mii beeb, n ln ba na bá neer-m kpaturun n hayan n nan kɔrgun lee. Hà toglg ka bɔhɔɔ-ba hayen hà jugu gwɛɛt jugu jugu ka ta seena-ba.*

Seenb

1 ¹ Man nnii Fɔɔla, Yeesu Krista *tumta. Sangband sɔkl n hɛm na mà kitg welee. Má n t`teel Timotee t`hoora wadgankena ² ka seena t`teelba Sangband reba nen, nen ba Kolɔɔs kɔrgun ka laglɔ n Krist n ka nawr n wun nen. T`Sa Sangband hɔmgu n hà nigligu bem n`man!